



長樂郡
振錄西
諸子老

陶靖節集卷之七

傳贊

天子孝傳贊

虞舜

夏禹

殷高宗

周文王

虞舜父頑母嚚事之於畎畝之間以孝烝烝是以堯聞而授之富有天下貴為天子以為不順於父母若窮而無歸惟聞親可以得意苟違朝夕若嬰兒之思戀故稱舜五十而慕書曰戛擊



鳴球搏拊琴瑟以詠祖考來格言思其來而訓
一作謂之愛敬盡於事親是以德教加於百姓刑
于四海夏禹有天下以奉宗廟然躬自菲薄以
厚其孝孔子曰禹吾無間然矣菲飲食而致孝
乎鬼神惡衣服而致美乎黻冕禹之德於是稱
聞聖人之德無以加於孝敬孝敬之道美莫大
焉殷高宗諒陰三年不言百官總已而聽於冢
宰三年而後言天下咸歡德教大行殷道以興
詩曰一人有慶兆民賴之其此之謂乎周文王

之爲世子也朝於王季日三雞鳴至於寢門問
於內豎內豎曰安文王乃喜不安則色憂行不
能正履日中暮亦如之食上必視寒溫之節食
下必問所膳而後退文王孝道光其化自近
至遠刑于寡妻以御于家邦故得萬國之歡心
以事其先王矣

贊曰

至哉后德聖敬自天陶漁致養菲薄享先親瘠
色憂諒陰寢言一人有慶千載賴旃

諸侯孝傳贊

周公旦

魯孝公

河間惠王

周公旦武王之弟成王幼少周公攝政制禮作樂郊祀后稷以配天宗祀文王於明堂以配上帝是以四海之內各以其職來祭詩曰於穆清廟肅雍顯相言諸侯樂其位而敬其事也仲尼曰孝莫大於嚴父嚴父莫大於配天則周公其人也貴而不驕位高彌謙自承文武之休烈孝道通于神明光被四海武王封之於魯備其禮

樂以奉宗廟焉魯孝公之爲公子周宣王問公子能道訓諸侯者立之樊穆仲稱其孝曰肅恭明神而敬事耆老賦事行刑必問於遺訓咨於故寔不干所問不犯所咨王曰然則能訓理其民矣乃命之於夷宮是爲孝公夫宗廟致敬不忘親也有國不亦宜乎漢河間惠王獻王之曾孫也西京藩臣多驕放之失其名德者唯獻王而惠王繼之漢書稱其能脩獻王之行毋薨服喪盡禮哀帝下詔書褒揚以爲宗室儀表增封

萬戶禮古之人皆然至於末俗衰薄固已賢矣
貴而率禮又難其見褒賞不亦宜乎

贊曰

貴驕殊途不期而會周公勞謙乃成光大二侯
承魯遵儉去秦河間率禮漢宗是賴

卿大夫孝傳贊

孔子

孟莊子

穎考叔

孔子魯人也。入則事父兄。出則事公卿。喪事不
敢不勉。故稱曰。孝乎惟孝友于兄弟。是亦爲政

也。君賜腥。必熟而薦之。雖蔬食而齊。祭如在。鄉
人讎。朝服立於阼階。孝之至也。至德要道莫大
於孝。是以魯參受而書之。游夏之徒。常咨稟焉。
許止不嘗藥。書以殺父。宰我暫言減喪。責以不
仁。言合訓典。行合世範。德義可尊。作事可法。遺
文不朽。揚名千載。孟莊子魯人也。孔子稱其孝。
其他可能也。其不改父之政與父之臣。是難能
也。夫孝子之事親也。事亡如事存。故當不義則
爭之。存所不爭。則亡亦不敢改父之道。猶謂之

孝。况終身乎。穎考叔鄭人也。莊公以叔段之故與母誓曰。不及黃泉無相見也。既而悔之。考叔為封人。聞之。有獻於公。公賜之食。而舍肉。公問之。對曰。小人有母。未嘗君之羹。請以遺之。公曰。汝有母遺。繫我獨無。考叔曰。何謂也。公語之故。且告之悔。考叔曰。若掘地及泉。隧而相見。其誰曰不然。公從之。遂為母子如初。君子曰。穎考叔純孝也。愛其母而施及莊公。詩云。孝子不匱。永錫爾類。其是之謂乎。

贊曰

仁惟本悌。聖亦基孝。恂恂尼父。固天攸造。一作導二子承親。式禮遵誥。永錫純懿。無改遺操。

士孝傳贊

高柴

樂正子春

孔奮

黃香

高柴衛人也。喪親泣血三年。未嘗見齒。所謂哭不偯。言不文也。為武城宰而化行。民有不服其親者。改之。行喪如禮。君子之德風也。以身先之。

陶集
而民不遺其親。樂正子春魯人也。下堂傷足。既
瘳。數月不出。猶有憂色。曰。吾聞之。曾子父母全
而生之。已全而歸之。可謂孝矣。故君子一舉足。
一出言。不敢忘父母。不敢毀傷。孝之始也。夫能
敬慎若斯。而災患及者。未之有也。孔奮扶風人
也。少以孝行著名州里。供養至謹。在官唯母極
甘美。妻息菜食。歷位以清。夫人情莫不欲厚其
親。然亦有分焉。奮則難繼。能致儉以全養者。鮮
矣。黃香江夏人也。九歲失母。思慕骨立。事父竭

力以致養。冬無被褥。而盡滋味。暑則扇床枕。寒
則以身溫席。漢和帝嘉之。特加異賜。歷位恭勤。
寵祿榮親。可謂夙興夜寐。無忝爾所生者也。

贊曰

顯允群士。行如名鈞。咸能夙夜。以義榮親。率彼
城邑。用化厥民。忠以悟主。其孝乃純。

庶人孝傳贊

江革

廉範

汝郁

殷陶

江革。齊人也。漢章帝時。避賊負母而逃。賊賢之。不害。而告其生路。竭力傭債。以致其暖。和顏悅色。以盡歡心。欲親之安。自挽車以行。鄉人歸之。號曰江巨孝。位至五官中郎將。天子嘉焉。寵遇甚厚。告歸。詔書褒美。就家禮。其終身以顯異行。廉範。京兆人也。少孤。十五入蜀。迎父喪。遇石船覆。範執骸一作棺而沒。船人救之。僅免於死。遂以喪歸。及仕郡。拯太守於危難。送故盡節。章帝時。爲郡守。百姓歌詠之。夫孝者人之本。教之所由。

生也。是以範之臨危也。勇宰民也。惠能以義顯也。汝郁。陳郡人也。五歲。母病不食。郁亦不食。母憐之。強食。郁能察色。知病。輒復不食。族人號曰異童。年十五。著於鄉里。父母終。思慕致委。推財與兄弟。隱於草澤。君子以爲難。况童。鬪孝於自然。可謂天性也。殷陶。汝南人也。年十二。以孝稱。遭父憂。率情合禮。有長蛇帶其門。舉家奔走。陶以喪柩在焉。獨居廬不動。親戚扶持。曉諭莫能移之。啼號益盛。由是顯名。屢辭辟命。夫智者不

陶集
惑勇者不懼。陶孝於其親。而智勇並彰乎弱齡。斯又難矣。

贊曰

事親盡歡。其難在色。彼養以祿。我養以力。義在一作存愛敬。榮不假飾。嗟爾衆庶。鑒茲前式。

扇上畫贊

荷蓀丈人

長沮桀溺

於陵仲子

張良公

丙曼容

鄭次都

薛孟嘗

周陽珪

三五道邈。淳風日盡。九流參差。互相推隕。形逐物遷。心無常準。是以達人。有時而隱。四體不勤。五穀不分。超超丈人。日夕在耘。遼遼沮溺。耦耕自欣。入鳥不駭。雜獸斯群。至矣於陵。養氣浩然。蔑彼結駟。甘此灌園。張生一仕。曾以事還。顧我不能。高謝人間。峒峒丙公。望崖輒歸。匪驕匪吝。前路威夷。鄭叟不合。垂釣川湄。交酌林下。清言究微。孟嘗遊學。天網時踈。眷言哲友。振褐偕徂。美哉周子。稱疾閑居。寄心清尚。悠然自娛。翳翳

陶集
衡門洋洋泌流。曰琴曰書。顧盼有儔。飲河既足。自外皆休。緬懷千載。託契孤遊。

陶靖節集卷之七

終

陶靖節集卷之八

疏 祭文

與子儼等疏

告儼俟份佚。俸天地賦命。生必有死。自古賢聖。誰能獨免。子夏有言。死生有命。富貴在天。四友之人。親受音旨。發斯談者。將非窮達不可妄求。壽夭永無外請。故耶吾年過五十。少而窮苦。每以家弊。東西游走。性剛才拙。與物多忤。自量為已。必貽俗患。僂俛辭世。使汝等幼而饑寒。余嘗

感孺仲賢妻之言。敗絮自擁。何慙兒子。此既一事矣。但恨隣靡二仲。室無萊婦。抱茲苦心。良獨內愧。少學琴書。偶愛閑靜。開卷有得。便欣然忘食。見樹木交蔭。時鳥變聲。亦復歡然有喜。常言五六月中。北窓下卧。遇涼風暫至。自謂是羲皇上人。意淺識罕。謂斯言可保。日月遂往。機巧好踈。緬求在昔。眇然如何。病患以來。漸就衰損。親舊不遺。每以藥石見救。自恐大分將有限也。汝輩稚小。家貧。每後柴水之勞。何時可免。念之在

心。若何可言。然汝等雖曰同生。

白一作不當思四海

皆兄弟之義。鮑叔管仲。分財無猜。歸生伍舉。班

荆道舊。遂能以敗爲成。因喪立功。他人尚爾。况

同父之人哉。潁川韓元長。

名融漢末名士。身處卿

佐。七十而終。

集本作八十

兄弟同居。至于沒齒。濟北

汜。

音稚春。晉書汜毓字稚春。

晉時操行人也。七世同財。

家人無怨色。詩曰。高山仰止。景行行止。雖不能

爾。至心尚之。汝其慎哉。吾復何言。

東坡曰。吾於淵明。豈獨好其詩哉。如其

爲人實有感焉。淵明告儼等疏。此語蓋實錄也。吾真有此病。而不蚤自知。半世出仕以犯大患。此所以深愧淵明。欲以晚節師範其萬一也。

趙泉山曰。或疑此疏。規規遺訓。似過爲身後慮者。是大不然。且父子之道。天性也。何可廢乎。靖節當易簣之際。猶不忘。詔其子以人倫大義。欲表正風化。與夫素隱行怪。徒潔身而亂大倫者。異矣。

又曰。吾年過五十。少而窮苦。每以家弊。東西游走。當作年過三十。按靖節從此十一年間。自潯陽至建業。再返。又至江陵再返。故云東西游走。及四十一歲。序其倦游於歸去來云。心憚遠役。四十八歲。答龐參軍詩云。我實幽居士。無復東西緣。若年過五十。時投閑十年矣。尚何游宦之有。

東塾燕談曰。淵明與子儼疏。余嘗感儒

仲賢妻之言。

集本作孺
今從漢書

敗絮自擁。何慙

兒子。此盖一事矣。但恨隣靡二仲。室無

萊婦。抱茲苦心。良獨內愧。按范曄後漢

書。王霸傳。霸字儒仲。又列女傳。霸少立

高節。光武時。連徵不仕。霸與同郡令狐

子伯為友。後子伯為楚相。而其子為郡

功曹。子伯遣子奉書於霸。客去而久卧

不起。妻怪。問其故。霸曰。向見令狐子。容

服甚光。舉措有適。而我兒蓬髮歷齒。未

知禮。則見客而有慚色。父子恩深。不覺

自失耳。妻曰。君少脩清節。不顧榮祿。今

子伯之貴。孰與君之高。君躬勤苦。子安

得不耕以養。既耕。安得不黃頭歷齒。柰

何。忘宿志。而慙兒女子乎。霸屈起而笑

曰。有是哉。遂共終身。隱遯。又嵇康高士

傳。求仲羊仲。皆治車為業。控廉逃名。蔣

元卿之去兖州。還杜陵。荆棘塞門。舍中

有三徑不出。唯二人從之游。時人謂之

陶集
二仲亦載三輔決錄。又劉向列女傳。楚老萊子。逝世耕於蒙山之陽。荒葭爲墻。蓬蒿爲室。衣緇飲水。食菽。墾山播種。五穀。或言於楚王曰。老萊隱士也。王使人聘。以璧帛不來。王遂駕至老萊之門。老萊方織畚。王曰。願先生臨之。老萊子曰。僕山野之人也。不足以守政。王復曰。願終變先生之志。老萊子曰。諾。王去有間。其妻戴畚挾薪而來。謂老萊子曰。是何

車跡之衆也。老萊子曰。楚王欲使吾守楚國之政。妻曰。子許之乎。老萊子曰。然。妻曰。妾聞之。可食以酒肉者。可隨以鞭。捶。可授以官祿者。可隨以鈇鉞。今先生食人之酒肉。受人之官祿。此皆人之所制也。居亂世而爲人所制。能免於患乎。老萊子遂隨其妻。至於江南而止。

祭程氏妹文

維晉義熙三年五月甲辰。程氏妹服制再周。淵

明以少牢之奠俛而酌之嗚呼哀哉寒往暑來
 日月寢踈梁塵委積庭草荒蕪寥寥空室哀哀
 遺孤肴觴虛奠人逝焉如誰無兄弟人亦同生
 嗟我與爾特百常情謝玄傳痛百常情作迫非慈妣庶母早世
 時尚孺嬰我年二六爾纔九齡爰從靡識撫髻
 相成咨爾令妹有德有操靖恭鮮言聞善則樂
 能正能和惟友惟孝行止中閨可象可倣我聞
 為善慶自已蹈彼蒼何偏而不斯報昔在江陵
 重罹天罰晉安帝隆安五年秋七月赴兄弟索
駕還江陵是冬母孟氏卒

居垂隔楚越伊我與爾百哀是切黯黯高雲蕭
 蕭冬月白雲掩晨長風悲節感惟崩號興言泣
 血尋念平昔觸事未遠書疏猶存遺孤滿眼如
 何一往終天不返寂寂高堂何時復踐藐藐孤
 女曷依曷侍煢煢遊魂誰主誰祀柰何程妹於
 此永已死如有知相見蒿里嗚呼哀哉

祭從弟敬遠文

歲在辛亥月惟仲秋旬有九日從弟敬遠卜辰
 云窆永寧右土感平生之游處悲一往之不返

情惻惻以摧心淚愍愍而盈眼乃以園果時醪
祖其將行嗚呼哀哉於鑠吾弟有操有槩孝發
幼齡友自天愛少思寡欲靡執靡介後已先人
臨財思惠心遺得失情不依世其色能溫其言
則厲樂勝朋高好是文藝遙遙帝鄉爰感竒心
絕粒委務考槃山陰淙淙在宗切水聲也懸溜暖暖荒
林晨採上藥夕閑素琴曰仁者壽竊獨信之如
何斯言徒能見欺年甫過立奄與世辭長歸蒿
里邈無還期惟我與爾匪但親友父則同生母

則從母

從音縱爾雅曰母之姊妹為從母

相及齧齒

齧與齧義同毀齒也

家語曰男子八歲而齧齧音條齧音觀

並罹偏咎

靖節年三十七母孟氏卒是偏

咎為失怙也

斯情實深斯愛實厚念疇昔日同房之

歡冬無緼褐夏渴瓢簞相將以道相開以顏豈
不多乏忽忘饑寒余嘗學仕纏繇人事流浪無
成懼負素志斂策歸來爾知我意常願携手寘
彼衆意每憶有秋我將其刈與汝偕行舫舟同
濟三宿水濱樂飲川界靜月澄高温風始逝撫
杯而言物久人脆柰何吾弟先我離世事不可

尋思亦何極日徂月流寒暑代息死生異方存
亡有域候晨永歸指塗載陟呱呱遺稚未能正
言哀哀嫠人_{也寡婦}禮儀孔閑庭樹如故齋宇廓
然孰云敬遠何時復還余惟人斯昧茲近情著
龜有吉制我祖行望旒翩翩執筆涕盈神其有
知昭余中誠嗚呼哀哉

自祭文

歲惟丁卯律中無射天寒夜長風氣蕭索_{音陶}
子將辭逆旅之館永歸於本宅故人悽其相悲

同祖行於今夕羞以嘉蔬薦以清酌候顏已冥
聆音愈漠嗚呼哀哉茫茫大塊悠悠高旻是生
萬物余得爲人自余爲人逢運之貧簞瓢屢罄
絺綌冬陳含歡谷汲行歌負薪翳翳柴門事我
宵晨春秋代謝有務中園載耘載耔迺育迺繁
欣以素牘和以七絃冬曝其日夏濯其泉勤靡
餘勞心有常閒樂天委分以致百年惟此百年
夫人愛之懼彼無成愒日惜時存爲世珍沒亦
見思嗟我獨邁曾是異茲寵非已榮涅豈吾緇

粹兀窮廬酣飲賦詩識運知命疇能罔眷余今
斯化可以無恨壽涉百齡身慕肥遁從老得終
奚所復戀寒暑逾邁亡既異存外姻晨來良友
宵奔葬之中野以安其魂宵宵我行宵鳥了切
深目也
蕭蕭墓門奢侈宋臣儉笑王孫廓兮已滅慨焉
已遐不封不樹日月遂過匪貴前譽孰重後歌
人生寔難死如之何嗚呼哀哉

此文乃靖節之絕筆也

東坡曰淵明自祭文出妙語於續息之

餘豈涉死生之流哉

陶靖節集卷之八 終

陶靖節集卷之九

集聖賢群輔錄上

明由曉升級

宋均曰級等差政所先後也

必育受稅俗

宋均曰受

賦稅及徭役所宜施為也

成博受古諸

宋均曰古諸侯職等也

隕丘

一作

立受延嬉

宋均曰延長嬉興也主受此錄也

右燧人四佐燧人出天四佐出洛

宋均曰出

天天所生出洛地所生也

金提

一作

主化俗

宋均曰為民除災害也

鳥明主建福

宋均

日福利民也

視默主災惡

宋均曰為民除災害也

紀通為中職

宋均曰為田仲起為海陸宋均曰主平陽侯為主主內職也江海宋均曰主江海事一本作江湖

右伏羲六佐六佐出世宋均曰安戲不及燧人故增二

佐出世人所生也

風后受金法宋均曰金法言能決理是非也天老受天籙宋均曰籙

命也天教五聖受道級宋均曰級知命受糾俗宋均曰糾

也維絡正窺紀受變復宋均曰有禍地典受州絡宋均曰絡

也維絡力墨受準斥宋均曰準斥凡事也力墨或作力牧

右黃帝七輔州選舉翼佐帝德自燧人

四佐至七輔見論語摘輔象

重 該 脩 熙

右少昊四叔實能金木及水使重為勾

芒該為蓐收脩及熙為玄冥世不失職

遂濟窮桑見左傳蔡墨辭

羲仲 羲叔 和仲 和叔

右羲和四子孔安國云即堯之四岳分

掌四岳諸侯鄭玄云堯既分陰陽為四

時命羲仲和仲羲叔和叔等為之官又

主方岳之事是為四岳見鄭尚書注

伯夷為陽伯樂舞侏離 義仲之後為義伯樂舞

瞽哉歌 棄為夏伯樂舞武漫哉歌曰 義叔曰南陽

之後為義伯樂舞將陽 咎繇為秋伯樂舞蔡

零 和仲之後為和伯樂舞未詳 垂為冬伯歌曰朱華

落 樂舞丹鳳一曰齊落 歌曰齊樂一曰縵 垂為冬伯歌曰歸來

右八伯自義和死後分置八伯舜既即位元祀巡狩每至其方各貢兩伯之樂大傳冬伯後闕一人鄭玄云此上下有

脫辭其說未聞十有五祀後又百工相和而歌慶雲八伯稽首而進者也見尚

書大傳

謹堯 共工 鯀 三苗

右四凶

蒼舒 隕散 檮戡 大臨 龍降 庭堅

仲容 叔達

右高陽氏才子八人齊聖廣淵明允篤誠天下之民謂之八凱

伯奮 仲堪 叔獻 季仲 伯虎 仲熊
叔豹 季狸

右高辛氏才子八人忠肅恭懿宣慈惠
和天下之民謂之八元從四凶至此悉
見左傳季文子辭

禹作司空 棄作稷 契作司徒

咎繇作士 益作朕虞 垂作共工

伯夷作秩宗 龍作納言 夔作典樂

右九官舜登帝位所選命見尚書

世陶 方回 續牙 伯陽 東不訾或云不識

示不虛或云不空 靈甫

右舜七友並為歷山雷澤之游戰國策
顏斲云堯有九佐舜有七友而尸子只
載雄陶等六人不載靈甫皇甫士安作
逸士傳云視其友則雄陶方回續牙伯
陽東不訾秦不空靈甫之徒是為七子
與戰國策相應

禹 稷 契 皋陶 益

右舜五臣見論語已列九官中

稷 契 皋陶 伯夷 垂

夔

右八師見楚辭七諫

伯夷 禹 稷

右三后伯夷降典制民惟刑禹平水土
主名山川稷降播種農殖嘉穀三后成
功惟殷于民漢太尉楊賜曰昔三后成
功皐陶不與焉盖吝之也見尚書甫刑

後漢書

微子 箕子 比干

右殷三仁論語曰微子去之箕子為之
奴比干諫而死孔子曰殷有三仁焉

伯夷 太公

右二老尚書大傳曰太公避紂居東海
之濱皆率其黨曰盍歸乎吾聞西伯昌
善養老此二人者蓋天下之大老也往
而歸之是天下之父歸之也天下之父

歸之其子曷往孔融曰西伯以二老開
王業

闕夭

太公望

南宮适

散宜生

右文王四友尚書大傳云闕夭南宮适
散宜生三子學于太公望望曰嗟乎西
伯賢君也四子遂見西伯於姜里孔子
曰文王有四臣丘亦得四友此四人則
文王四隣也

伯達

伯适

仲突

仲忽

叔夜

叔夏

季隨

季騶

右周八士見論語賈逵以爲文王時鄭
玄以爲成王時也

伯邑考

武王發

管仲鮮

周公旦

蔡叔度

曹叔振鐸

霍叔武

邳叔處

康叔封

聃季載

一本無邳叔
處有毛叔圉

右太姒十子太史公曰太姒十子周以
宗強見史記

周公旦

邵公奭

太公望

公

毛公

閔公

太顛

南宮适

散宜生

文母太妣也

右周十亂見論語其四人已列四友

秦公牙

吳班

孫尤

夫人冉贄

公子麋

右五王並能相焉尸子曰古有五王之相廼謂之王其貴之也

狐偃

趙衰

顛頡

魏武子

司空季子

右晉文公從亡五人叔向曰三十七年有士五人見左傳及晉太尉劉琨詩曰重耳憑五臣

奄息

仲行

鍼虎

右三良子車氏之子秦穆公沒要以從死詩人悼之為賦黃鳥見左傳毛詩

子展賦草蟲子罕

子西賦黍苗子駟

子產

賦隰桑

子國

公孫段賦桑扈

子豐

伯有賦

鶉之賁賁

子良孫子耳子

子太叔賦野有蔓草

子游孫子

子矯

印段賦蟋蟀

子甲孫子張子

右鄭七穆謂之七子鄭穆公子十有一

人罕駟豐印遊國良七人子孫並有才

名世任鄭國之政以免晉楚之難謂之

七穆叔向日鄭七穆氏其后亡乎及諸

侯為宋之盟鄭伯享趙武于垂隴七卿

皆從文子曰七卿從君以寵武也請皆

賦以卒君貺亦以觀七子之志見左傳

又吳質書云趙武過鄭七子賦詩

仲孫毅文伯

獻子莊子孝伯信子懿子武伯

叔孫得臣莊叔

穆子昭子成子武子文子

季孫行父文子

武子悼子平子桓子康子

右魯桓公之曾孫世秉魯政號曰三桓

孔子曰三桓之子孫微矣見論語左傳

趙無恤襄子

趙衰始為卿至無恤四世

范吉射昭子

士會始為

卿至吉射五世

智瑤襄子

荀首始為卿至瑤六世

荀寅文子

卿至寅四世

魏多襄子

魏絳始為卿至多四世

韓不

信簡子

韓厥始為卿至不信四世

右六族世為晉卿並有功名此六人寔弱晉國淳于越云卒有田常六卿之臣劉向亦曰田常復見於今六卿必起於漢見左傳史記漢

儀封人

荷蕢

晨門

楚狂接輿

長沮

桀溺

荷蓀丈人

一作伯夷叔齊虞仲夷逸朱張柳下惠少連

右作者七人論語曰賢者避世其次避

地其次避色其次避言孔子曰作者七人見包氏注董威贊詩曰洋洋乎盈耳哉而作者七人

德行

顏淵

閔子騫

冉伯牛

仲弓

言語

宰我

子貢

政事

冉有

季路

文學

子游

子夏

右四科見論語

顏回

子貢

子路

子張

右孔子四友文王有胥附奔奏先後禦侮謂之四隣孟懿子曰夫子亦有四隣乎子曰吾有四友焉自吾得回門人益親是非胥附乎自吾得賜遠方之士日至是非奔奏乎自吾得師前有光後有輝是非先後乎自吾得由惡言不至於門是非禦侮乎見孔叢子

顏回

冉仲弓

子路

宰我

子貢

公西華

右六侍仲尼志意不立子路侍儀服不脩公西華侍禮不習子貢侍辭不辯宰我侍亡忽古今顏回侍節小物冉伯牛侍曰吾以夫六子自厲也見尸子

檀子

盼子

黔夫

種首

右齊威王彊場四臣齊威王與魏惠王會田於郊魏王問威王曰王有寶乎威王曰無有魏王曰若寡人國雖小猶有

徑寸之珠照前後車各十二乘者十枚
柰何爲萬乘之國而無寶乎威王曰寡
人之所以爲寶與王異吾臣有檀子者
使守南城則楚人不敢爲寇東取泗上
十二諸侯皆來朝吾臣有盼子者使守
高唐則魏人不敢東漁於河吾臣有黔
夫者使守徐則燕人祭北門趙人祭西
門徙而從之者七十餘家吾臣有種首
者使備盜賊則道不拾遺以此爲寶將

以照千里豈直十二乘哉魏惠王慙不
懌而去見史記及春秋後語

齊孟嘗君田文

魏信陵君無忌

趙平原君趙勝

楚春申君黃歇

右戰國四豪見史記

太子少傅留文成侯韓張良

相國鄼文終侯沛蕭何

楚王淮陰侯韓信

右三傑漢高祖曰此三人人之傑也見

漢書

園公

姓園名秉字宣明陳留襄邑人常居園中故號園公見陳留志

綺里季

夏黃公

姓崔名廓字少通齊人隱居脩道號夏黃公見崔氏譜

角里

先生

右商山四皓當秦之末俱隱上洛商山皇甫士安云並河內軹人見漢書及皇

甫謚高士傳

太子太傅踈廣字仲翁

宣帝本始四年魏相為御史大夫薦廣於霍光

時年六十以元康三年告退年六十七

太子少傅踈受字公子

廣兄子也

右二踈東海人宣帝時並為太子師傅每朝太傅在前少傅在後朝廷以為榮授太子論語孝經各以老疾告退時人謂之二踈見漢書

重合令子輿

居宋里

櫟陽令子羽

居東觀里

東海太守子仲

居宜唐里

兗州刺史子明

居西南里

潁陽令子良

居遂與里

右郡央曹掾汝南周燕少卿之五子號

曰五龍各居一里子孫並以儒素退讓
為業天下著姓見周氏譜及汝南先賢
傳

龔勝字君賓

龔舍字君倩

或曰長倩

右並楚人皆治清節世號二龔見漢書
唐林字子高 唐尊字伯高

右並沛人亦以潔履著名於成哀之世
號為二唐比楚二龔後皆仕王莽見漢
書左思曰二唐潔已乃黜乃汚

平阿侯王譚

成都侯王商

紅陽侯王章

曲陽侯王根

高平侯王逢時

右並以元后弟同日受封京師號曰五
侯並奢豪富侈招賢下士谷永樓護皆
為賓客時人為之語曰谷子雲之筆札
樓君卿之唇舌言出其門也見漢書張
載詩曰富侈擬五侯

北海逢萌字子康

北海徐房字平原

李曇字子雲

平原王遵字君公

右皆懷德穢行不仕亂世相與爲友時人號之四子見後漢書嵇康高士傳

求仲 羊仲

右二人不知何許人皆治車爲業挫廉逃名一作世蔣元卿之去兗州還杜陵荆棘塞門舍中有三逕不出惟二人從之游時人謂之二仲見嵇康高士傳

太傅高密元侯南陽鄧禹字仲華

大司馬廣平忠侯南陽吳漢字子顏

左將軍膠東剛侯南陽賈復字君文

建威大將軍好時愍侯扶風耿弇字伯昭

執金吾雍奴威侯上谷寇恂字子翼

征西大將軍陽夏節侯潁川馮異字公孫

征南大將軍舞陽壯侯南陽岑彭字君然

征虜將軍潁陽成侯潁川祭遵字弟孫

太常靈壽侯信都邳彤字偉君

東郡太守東莞成侯鉅鹿耿純字伯山

上谷太守淮陰侯穎川王霸字元伯

左中郎將朗陵愍侯穎川臧宮字君翁

驃騎大將軍櫟陽侯馮翊景丹字孫卿

驃騎大將軍參蘧侯南陽杜茂字諸公

建義大將軍萇侯南陽朱祐字仲先

驃騎將軍慎靖侯南陽劉隆字元伯

揚武將軍全椒侯南陽馬成字君遷

大司空阜成侯漁陽王梁字君嚴

衛尉安城忠侯穎川姚期字次兄

左馮翊安平侯漁陽蓋延字巨卿

捕虜將軍揚虛侯南陽馬武字子張

驍騎將軍昌城侯鉅鹿劉植字伯先

左將軍阿陵侯南陽任光字伯卿

豫章太守中水侯東萊李忠字仲都

左將軍槐里侯扶風萬脩字君游

琅邪太守祝阿侯南陽陳俊字子昭

積弩將軍昆陽威侯穎川傅俊字子衛

揚化將軍合肥侯穎川堅鐔字子伋

陶集
右河北二十八將光武所與定天下見
後漢書張衡東京賦云受鉞四七共工
以除

武威太守梁統字仲寧

金城太守庫鈞字巨公

張掖太守史苞字叔文

酒泉太守竺曾字巨公

焯煌太守辛彤字大房

右河西五守是時更始已爲赤眉所害

隗囂密有異志統等五人共推竇融爲
河西大將軍內撫吏民外禦寇戎東伐
隗囂歸心世祖克建功業見後漢書及
善文

大鴻臚韋孟達

上黨太守公孫伯達

河陽長魏仲達

右扶風平陵人同時齊名世號三達孟
達名彪丞相賢五世孫明帝時人見漢
書及決錄

光祿大夫周舉

光祿大夫杜喬

光祿大夫周栩

尚書樂巴

青州刺史馮羨

兗州刺史郭遵

太尉長史劉班

侍御史張綱

右八使漢順帝時政在權宦官以賄成

周舉等議遣八使循行風俗同日俱發

天下號曰八使見張璠漢紀

平輿令韋順字叔文

歷位樂平相去官以琴書自娛不應三公之命後為

平輿令吏民立祠社中

順弟武陽令豹字季明

友人羅陵犍為縣丞卒官喪柩流離豹棄官致

喪歸比辟公府輒棄去司徒劉愷尤敬之

豹弟廣都長義字季節

少好學不求榮利四十乃仕三為令長皆有惠

化以兄喪去官比辟公府不就廣都為立生祠焉

右清河太守韋文高之三子皆以學行

知名時人號韋氏三君見京兆舊事

楊震字伯起

以太常為司徒遷太尉

震子秉字叔節

以太常為太尉

秉子賜字伯獻

以光祿勳為公再司徒一太尉

賜子彪字文先以大中大夫為公

右楊氏四公弘農華陰人自孝安至獻帝七世父子以德業相繼為三公見續

漢書

袁安字邵公以太僕為司空遷司徒

安子敞字叔平為司空光祿勳

敞子湯字仲河以太僕為司空遷司徒

湯子逢字周陽以屯騎校尉為司空

逢弟隗字次陽以太常為司空太尉

右袁氏四世五公見續漢書

處士豫章徐穉字孺子

京兆韋著字休明汝南袁閎字夏甫

彭城姜肱字伯淮潁川李曇字子雲

右太傅汝南陳公時為尚書令與諸尚書悉名士也共薦此五人時號五處士見續漢書及善文

周子居黃叔度 艾伯堅

鄧伯向封武興 盛孔叔

右汝南六孝廉太守李俔選此六人以
應歲舉受版未行俔死子居等遂駐行
喪俔妻於柩側下帷見之厲以宜行子
居嘆曰不有行者莫宣公不有止者莫
卹居於是與伯堅即日辭行封黃四人
留隨柩車見杜元凱女戒

大將軍槐里侯扶風平陵竇武字游平

天下忠誠竇游

太傅高陽鄉侯汝南平輿陳蕃字仲舉

天下義府陳仲

舉

侍中河間樂成劉淑字仲承

天下德弘劉仲承

右三君

少傅潁川襄城李膺字元禮

天下模楷李元禮

司空山陽高平王暢字叔茂

天下英秀王叔茂

太僕潁川陽城杜密字周甫

天下良輔杜周甫

司隸校尉沛國朱寓字季陵

天下水凌朱季陵

尚書會稽上虞魏朗字少英

天下忠貞魏少英

沛國潁陰荀昱字伯條

天下好交荀伯條

大司農博陵安平劉祐字伯祖天下稽古
太常蜀郡成都趙典字仲經天下才英

右八俊

有道太原介休郭泰字林宗天下和雍

太常陳留圉夏馥字子治天下慕特

尚書令河南鞏尹勲字伯元天下英藩

河南尹太山平陽羊陟字嗣祖天下清苦

議郎東郡陽平劉儒字叔林天下珪金

冀州刺史陳國項蔡衍字孟喜天下雅志

穎川太守渤海高城巴肅字恭祖天下卧虎

議郎南陽安衆宗慈字孝初天下通儒

右八顧後漢書無劉儒有范滂

御史中丞汝南召陵陳翔字子鱗海內貴珍

衛尉山陽高平張儉字元節海內忠烈

太尉掾汝南細陽范滂字孟博海內譽謬

蒙令山陽高平檀敷字文有海內通士

洛陽令魯國孔昱字世元海內才珍孔世元

太山太守渤海重合范康字仲真海內彬彬

大尉掾南陽棘陽岑暉字公孝海內珍好

鎮南將軍荊州牧武城侯山陽高平劉表字景

升海內所稱

右八及後漢書無范滂有翟超卓

少府東萊曲城王商字伯義海內賢智王伯義

郎中魯國蕃嚮字嘉景海內修整

北海相陳留己吾秦周字平王海內貞良

侍御史太山奉高胡毋班字季皮海內珍奇

太尉掾潁川陰劉翊字子相海內光光

冀州刺史東平壽張王考字文祖海內依怙

陳留相東平壽張張邈字孟卓海內嚴恪

荊州刺史山陽湖陸度尚字博平海內清明

右皆傾財竭已解釋怨結拯救危急謂

之八厨後漢書無劉翊有劉儒

從三君至此並見三君八俊錄

太丘長潁川陳寔字仲弓

寔子大鴻臚紀字元方

紀弟司空掾諶字季方

右並以高名號曰三君見甄表狀及邯鄲淳紀碑

陶靖節集卷之九 終

陶靖節集卷之十

集聖賢群輔錄下

太尉河南杜喬字叔榮

狀喬治易尚書禮記春秋晚好老子隱居不仕

年四十為郡功曹立朝正色有孔父之風

太常燉煌張奐字然明

狀奐庶方亮直學該群籍前後七徵十要三為

邊將財貨珍寶一無所取矯王孫裸形宋司馬為石椁幅巾時服無棺而葬焉

侍中河內向詡字甫興

狀詡博覽群籍兼好黃老古虛泊然肆志不慕

時倫積三十年

太傅汝南陳蕃字仲舉

狀蕃瓌偉秀出雅亮無倫學該墳典忠壯蹇諤

又曰明允貞亮與大將軍竇武志
匡社稷機事不密為羣邪所害

太尉沛國施延字君子狀延清公潔白進士許國臨難不顧名著漢朝

少府潁川李膺字元禮狀膺承三公之後生高潔之門少履清節非法

不言英聲宣於華夏高名冠於縉紳

司隸沛國朱寓字季陵一名詡右一人訪其中正無識知行狀者告本

郡訪問耆老識寓云桓帝時遭難無後

太僕潁川杜密字周甫狀密清高雅達名播四海歷統五郡恩惠化民

大鴻臚潁川韓融字允長狀融聰識知機發於岐嶷時人名之曰窮

神知化兄弟同居至於沒齒處卿相之位且二十年奉身守約不隕厥問

司空潁川荀爽字慈明狀爽年十二隨父在公府羣公卿校咸丈人也

或遣進奏或親候從儒林歸仗究極篇籍

司空清河房植字伯武狀植少履清苦孝友忠正歷位州郡政成化行

既登三事靖恭衮服雖季文相魯晏嬰在齊清風高節不是過也

聘士彭城姜肱字伯淮狀肱稟履玄知立性純固事親至孝五十而慕

學綜六藝窮通究微行隆華夏名播四海

太尉下邳陳球字伯真狀球清高忠直孝靈中年欲誅黃門常侍以此

遇害

司空山陽王暢字叔茂狀暢雅性貞實以禮文身居家在朝節行異倫

徵士陳留申屠蟠字子龍狀蟠年九歲喪父號泣過於成人未嘗見齒每至父母亡日三日不食在塚側致其露白雉以孝稱州郡表其門閭徵聘不就年七十二終於家

衛尉山陽張儉字元節狀儉體性忠直閨門孝友臨官賞罰清亮絕俗

大司農北海鄭玄字康成狀玄含海岱之純靈體大雅之洪則學無常師講求道奧敷宣聖範錯綜其數作五經注義窮理盡性也

徵士樂安冉璆字孟玉狀璆體清純之性蹈高不就除高唐令色斯而舉時陳仲舉李元禮仲弓皆難其高風

太尉漢中李固字子堅狀固當順桓之際號稱名臣大將軍梁冀惡直

醜正害其道桓帝即位遂死於讒

有道太原郭泰字林宗狀泰器量弘深孝友貞固名布華夏學冠群儒州郡禮命曾不旋軌辟司徒徵有道並不屈

益州刺史南陽朱穆字公叔狀穆中正嚴格有令政平民和有慮子賤之風上書陳損益辭切情至

尚書會稽魏朗字少英狀朗資純美之高亮幹輔國朝忠蹇正直之節

播於京師 聘士豫章徐穉字孺子狀穉妙德高偉清英超世前後三徵未嘗降志

抗名山棲養志浩然有夷齊之高蘧伯玉卷舒之術

度遼將軍安定皇甫規字威明

狀規少有岐嶷正直之節對策

指刺黃門梁冀不能用退隱山谷敦樂詩書

右魏文帝初為丞相魏王所旌表二十

四賢後明帝乃述撰其狀見文帝令及

甄表狀

太常燉煌張奐字然明

為度遼將軍幽并清靜吏民歌之徵拜大司農

賜錢除家一人為郎辭不受願徙居華陰故始為弘農人

度遼將軍安定皇甫規字威明

太尉武威段熲字紀明

右涼州三明並著威名於桓靈之世悉

名士也見續漢書

韋權字孔衡

弟瓚字孔玉

瓚弟矩字孔規

右太尉掾韋子才之三子皆脩仁義兄

弟孝友逢盜賊一人病不能去兄弟相

慕兵至俱死時人稱之號韋三義見三

輔決錄

荀儉字伯慈

漢侍中悅之父

儉弟緄字仲慈

濟南相漢光祿

大夫或之父
年六十六
紕弟靖字叔慈或問汝南許劭曰

二人皆玉也慈明外朗叔慈內潤靖隱身
脩學動必以禮太尉辟不就年五十五
靖

弟壽字慈光舉孝廉
年七十
壽弟汪字孟慈昆陽令
年六十

汪弟爽字慈明公卓微為平原相遷光祿勳
司空出自巖藪九十三日遂

登台司年
六十三
爽弟肅字敬慈守舞陽令
肅弟

粵字幼慈司徒掾
年七十

右朗陵令穎川荀季和之八子並有德

業時人號之八龍居西豪里渤海宛康

知名士也時為穎陰令美之曰高陽氏

才子八人遂改所居為高陽里見張璠

漢紀及荀氏譜

公沙紹字子起

紹弟孚字允慈北海耆舊傳稱

孚與荀爽共約出不得事貴勢而爽當董卓時脫巾未百日位至司空後相見以爽違約割席而坐
孚弟恪字允讓

恪弟達字義則

達弟樊字義起

右北海公沙穆之五子並有令名京師

號曰公沙五龍天下無雙穆亦名士也

見魏明帝甄表狀及後漢書

膠東令盧汜昭字興先 樂城令剛載祈字

子陵 穎陰令剛徐晏字孟平 涇令盧

夏隱字叔世 州別駕蛇丘劉彬字文曜云

世州

右濟北五龍少並有異才皆稱神童當
桓靈之世時人號為五龍見濟北英賢

傳

孝廉杜陵金敞字元休 位至兗州刺史 上計掾長陵

第五巡字文休 興先之子與先名種司空伯魚之孫名士也不詳巡位所至時

辟太尉掾

上計掾杜陵韋端字甫休 位至涼州牧太尉

右同郡齊名時人號之京兆三休並以

光武元年察舉見三輔決錄

晉宣帝河南司馬懿字仲達

魏司空穎川陳群字長文

中領軍譙朱鑠字彥才

侍中濟陰吳質字季重

右魏文帝四友見晉紀

魏步兵校尉陳留阮籍字嗣宗

中散大夫譙嵇康字叔夜

晉司徒河内山濤字巨源

建威參軍沛劉伶字伯倫

始平太守陳留阮咸字仲容籍兄子

散騎常侍河内向秀字子期

司徒琅邪王戎字濬冲

右魏嘉平中並居河内山陽共為竹林

之游世號竹林七賢見晉書魏書袁宏

戴逵為傳孫統又為讚

吳範相風吳人

劉惔占氣河内人

趙達筭河内人

皇象書廣陵人

嚴子卿碁名昭武衛尉峻從子

宋壽占夢十一不

曹丕與畫為孫權畫屏風誤落筆點素因以為

方知其非也孤城鄭姥相見王粲於童賤謂仕

必至師傳後為太子太傅

右吳八絕見張勃吳錄

陳留董昶字仲道 琅琊王澄字平子

陳留阮瞻字千里一云阮八百即瞻弟孚字遙集朗率多通故大將軍王敦

隋集

云方瞻有減
故云八百

穎川庾敬字子高

陳留謝鯤字幼輿

太山胡毋輔之字彥國

沙門于法龍

樂安光逸字孟祖

右晉中朝八達近世聞之故老

裴徽字文秀魏冀州刺史

裴楷字叔則徽弟三子晉光祿大夫

裴綽字季舒楷弟長水校尉

裴瓚字國賓楷子中書

裴邈字景初楷孫欽子太傅左司馬

裴遐字叔道

裴康字仲豫徽弟二子太子左率

裴頥字逸

民楷孫季子晉尚書僕射

王祥字休徵晉太保

王戎字濬冲父渾涼州刺史祥族子司

王澄字平子衍弟裴綽女壻荊州刺史

王導字茂弘

覽孫裁子敦從弟丞相

王綏字萬子戎子早亡裴康女壻王衍

字夷甫父文平北將軍戎從弟太尉

王敦字處仲覽孫基弟二子

王玄字眉子衍子陳留內史

右河東八裴琅琊八王聞之於故老

魏司空王昶字文舒昶子汝南太守湛字

處冲湛子東海內史承字安期承子

驃騎將軍述字懷祖述子安北將軍坦之

字文度 魏尚書僕射杜畿字伯侯 畿

子幽州刺史恕字務伯 恕子鎮南將軍預

字元凱 預子散騎常侍錫字世嘏 錫

子光祿大夫又字弘治

右太原王京兆杜各稱五世盛德聞之於故老夫書籍所載及故老所傳善惡聞於世者蓋盡於此矣漢稱田叔孟舒等十人及田橫兩客魯八儒史並失其名夫操行之難而姓名翳然所以撫卷

長嘆不能已已者也

八儒

夫子沒後散於天下設於中國成百氏之源為網紀之儒居環堵之室葦門圭竇甕牖繩樞併日而食以道自居者有道之儒子思氏之所行也衣冠中動作順大讓如慢小讓如僞者子張氏之所行也顏氏傳詩為道為諷諫之儒孟氏傳書為道為踈通致遠之儒漆雕氏傳禮為道為恭儉莊敬之儒仲梁氏傳樂為道以和陰陽

附錄
爲遺風易俗之儒樂正氏傳春秋爲道爲屬辭
比事之儒公孫氏傳易爲道爲潔淨精微之儒
三墨
不累於俗不飾於物不尊於名不忮於衆此宋
劔尹文之墨裘褐爲衣跂蹻爲服日夜不休以
自苦爲極者相里勤五侯子之墨俱稱經而背
譎不同相謂別墨以堅白此苦獲已齒鄧陵子
之墨

附錄

靖節徵士誄

宋金紫光祿大夫贈特進顏延之撰

夫璿玉致美不爲池湟之寶桂椒信芳而非園
林之實豈其樂深而好遠哉蓋云殊性而已故
無足而至者物之藉也隨踵而立者人之薄也
若乃巢由之抗行夷皓之峻節故已父老堯禹
錙銖周漢而緜世寢遠光靈不屬至死菁華隱
沒芳流歇絕不亦惜乎雖今之作者人自爲量
而首路同塵輟塗殊軌者多矣豈所以昭末景

陶集
泛餘波乎有晉徵士潯陽陶淵明南岳之幽居
者也弱不好弄長實素心學非稱師文取指達
在衆不失其寡處言每見其嘿少而貧苦一作病
居無僕妾井臼弗任藜菽不給母老子幼就養
勤匱遠惟田生致親之議追一作近悟毛子捧檄
之懷初辭州府三命後爲彭澤令道不偶物棄
官從好遂乃解體世紛結志區外定迹深棲於
是乎遂一作遠灌畦鬻蔬爲供魚菽之祭織絢緯
蕭以充糧粒之費心好異書性樂酒德簡棄煩

促就成省曠殆所謂國爵屏貴家人忘貧者與
有詔徵著作郎稱疾不赴春秋六十有三元嘉
四年月日卒於潯陽縣之某里一作柴桑里近識悲

悼遠士傷情冥默福應嗚呼淑貞夫實以誅華
名由謚高苟允德義貴賤何筭焉若其寬樂令
終之美好廉克已之操有合謚典無愆前志故
詢諸友好宜謚曰靖節徵士其詞曰

物尚孤

一作特

生人固介立豈伊時邁曷云世及

嗟乎若士望古遙集韜此洪族蔑彼名級睦親

之行至自非敦然諾之信重於布言廉深簡潔
 貞夷粹溫和而能峻博而不繁依世尚同詭時
 則異有一於此而兩一作非默置豈若夫子因心
 違事一作達理畏榮好古薄身厚志世霸虛禮州壤
 推風孝惟義養道必懷邦人之秉彝不隘不恭
 爵同下士祿等上農度量難鈞進退可限長卿
 棄官稚賓自免子之悟之何悟之辯賦辭歸來
 高蹈獨善亦既超曠無適非心汲流舊巘葺宇
 家林晨煙暮靄春煦秋陰陳書綴卷置酒絃琴

居備勤儉躬兼貧病人否其憂子然其命隱約

就閑遷延辭聘非直也明一作明也是惟道性糾纏

幹流冥漠報施孰云與仁實疑明智謂天盖高

胡讐斯義履信曷憑思順何寘年在中身疚病

疴疾視化如歸臨凶若吉藥劑弗嘗禱祠非恤

僚幽告終懷和長畢嗚呼哀哉敬述清一作靖節

式遵遺占存不願豐沒無求瞻省計却賻輕哀

薄斂遭壤以穿旋葬而窆嗚呼哀哉深心追往

遠情逐化自爾介居及我多暇伊好之洽接閭

隣舍宵盤晝憇非舟非駕念昔宴私舉觴相誨
獨正者危至方則礙哲人卷舒布在前載取鑑
不遠吾規子佩爾寔愀然中言而發遺衆速尤
迂風光蹶身才非實榮聲有歇一作音永矣
誰箴余闕嗚呼哀哉仁焉而終智焉而斃黔婁
既沒展禽亦逝其在先生同塵往世旌此靖節
加彼康惠嗚呼哀哉

北齊楊休之序錄

余覽陶潛之文辭采雖未優而往往有奇絕異

語放逸之致棲托仍高其集先有兩本行於世
一本八卷無序一本六卷并序目編比顛亂兼
復闕少蕭統所撰八卷合序目傳誄而少五孝
傳及四八目然編錄有體次第可尋余頗賞潛
文以爲三本不同恐終致忘失今錄統所闕并
序目等合爲一帙十卷以遺好事君子

宋朝宋丞相私記

右集按隋經籍志宋徵士陶潛集九卷又云梁
有五卷錄一卷唐志陶泉明集五卷今官私所

行本凡數種與二志不同有八卷者即梁昭明

太子所撰合序傳誄等在集前為一卷正集次

之亡其錄有十卷者即楊僕射所撰按休之字

齊為尚書左僕射以好學按吳氏西齋錄有宋

彭澤令陶潛集十卷疑即此也其序并昭明舊

序誄傳等合為一卷或題曰第一或題曰第十

或不置於集端則分四八目自甄表狀杜喬以

下為第十卷然亦無錄余前後所得本僅數十

家卒不知何者為是晚獲此本云出於江左舊

書其次第最若倫貫又五孝傳已下至四八目

子注詳密廣於他集惟篇後八儒三墨二條此

似後人妄加非陶公本意且四八目之末陶自

為說曰書籍所載及故老所傳善惡聞於世者

蓋盡於此即知其後無餘事矣按四八目例每

一疏所聞或經傳所出以結前意此故今不著輒

別存之以俟博聞者廣平宋庠私記

書靖節先生集後

梁鍾記室嶸評先生之詩為古今隱逸詩人之

宗今觀其風致孤邁蹈厲淳源又非晉宋間
者所能造也昭明太子舊所纂錄且傳寫寔訛
復多脫落後人雖加綜緝曾未見其完正愚嘗
採拾衆本以事讎校詩賦傳記贊述雜文凡一
百五十有一首洎四八目上下二篇重條理編
次爲一十卷近求嘉周仲章太守枉駕東嶺示
以

宋朝宋丞相刊定之本於疑闕處甚有所補其
楊僕射序錄宋丞相私記存于正集外以見前

後記錄之不同也時皇宋治平三年五月望日
思悅書

靖節先生江左偉人世高其節先儒謂其最善
任真者方其爲貧也則求爲縣令仕不得志也
則掛冠而歸此所以爲淵明設其詩文不工猶
當敬愛况如渾金璞玉前賢固有定論耶僕近
得先生集乃群賢所校定者因鋟于木以傳不
朽云

紹興十年十一月 日

書

林卷居士

陶靖節集卷十

終



Vertical text on the right edge, possibly a page number or library identifier.

